

Emprem Festival da la chanzun rumantscha

Questa fin d'jamna a Trun

DA PAUL DUFF / ANR

■ **In program pulpiu spetga ils amitgs dil cant durant treis dis al «Festival da la chanzun rumantscha» a Trun. Leu sespleiga la sentupada musicala en plirs loghens. Venderdis, sonda e dumengia dils 15 tochen ils 17 da mars vegn concertau, discutau e fabulau entuorn il tema dalla cultura cantica romantscha.** Quei empren Festival da la chanzun rumantscha porscha sin pliras tribunas cant choral, musica da brass accumpignonta, cant solistic da cantauturs e da classica ed era ils cumponists san seprestar al publicum. Cun tonta variaziun eis ei il meglier da surschar agl auditur, all'auditura da giudicar ordavon nua metter las prioritads e buca munchentar il principal. Cun quei patratg numein nus cheu la successiun dallas occurrenz.

Purschida per in e scadin

Il venderdis sera ei la tribuna libra per cantauturas e cantauturs romantschs (20.00–23.00). Las cantaduras *Astrid Alexandre*, *Sidonia Caviezel*, *Fiona Cavegn* seprestan da cumpignia culs cantadurs Tumasch è alias *Thomas Cathomen*, *Pascal Gamboni* e *Dario Hess*, quei gest suenter l'avertura dil festival ch'ei el center communal a Trun. Naven da quei liug sa igl auditur eleger da serender en caplutta s. Onna, sut tetg casa da scola ni en sala d'art.

Sonda ei il di dil cant choral. Buca sulet tedlar, na sez cantar dat anim e perquei serend'ins il meglier allas 09.30 el center communal a Trun per il cant en famiglia en cumpignia dil Chor d'affons Sumvitg e dil Chor d'affons Surselva. Gest suenter presenta *Corin Curschellas* culs Fränzlis da Tschlin in niev disc cumpact.

In act central ed innovativ dil festival ei la concorrenza da novas cumposiziuns. Ord las 31 cumposiziuns inoltradas ha ina giuria selezziunau e premiav duds canzuns dil gener chor d'affons, chor mischedau e chor viril. Las duas uras da suentermiezdi (14.00–16.00) ein dedicadas alla presentaziun da quella ovras. Era il publicum duei eleger la canzun preferida e premiar «la chanzun dal public». La sera ei dedidada al concert da gala. La Brass Band Berner Oberland, ils chors Incantanti e Cantus Firmus empermettan pura pial gaglina cun lur producziuns. Las treis formaziuns, dirigidas da *Corsin Tuor*, *Christian Klucker* e *Clau Scherrer*, han registrau in disc cumpact e battegian quel cul num «Pèrlas Rumantschas III» el concert (20.00–22.00). Han las producziuns dau anim da cantar astg'ins gest star e cantar da cumpignia en sala da cultura a Trun.

Dumengia vegn cantau cant solistic e silsuenter tratg bilanza filosofica en ina discussiun al podi. Las sopranistas *Sara-Bigna Janett* e *Judit Scherrer* ed il bariton



In vischin da Trun renomau ella scena dalla musica da brass ei Corsin Tuor, dirigent dalla Brass Band Berner Oberland. El tschenta il lungatg romantsch sin tribunas internaziunalas.

Lothar Burtscher contan canzuns dad Armon Cantieni, Gion Antoni Derungs e Benedetg Dolf (11.00–13.30).

L'uniun «La chanzun rumantscha» dat l'entschatta cun in festival musical.

Quel duei haver ina cuntinuaziun en las ulteriuras regiuns romantschas. Clau Scherrer e *Giusep Giuanin Decurtins* meinan igl empren project ch'empermetta animaziun entuorn la cultura

romantscha, il cant survegn cheutras impuls vivificonts per in niev slontsch.

Informaziuns e reservaziun da biglietti sut www.chanzunrumantscha.ch

Schlans: «Gea, i fa mal sch'ins guarda co i va...»

■ (rtr) **Ina giada atgna vischnanca cun var 200 abitantAs, oz vitget senza scola e stizun cun be pli var 80 abitantAs. Però i dat era l'otra vart. Gist ils ultims onns èn plirs familias giuvnas turnadas en la patria dals geniturs.** *Clemens Pfister*, pensiunà che viva gia dapi 28 onns puspè a Schlans, ed *Erica Cavegn-Pfister*, giuvna mamma da 33 onns ch'è turnada avant intgins onns cun sia famiglia a Schlans: Els raquintan lur istorgias tratgs vi e nà tranter sfidas che sa dattan entras la depopulaziun e speranza ed optimissem per l'avegnir. Erica Cavegn-Pfister, mamma e commembra dal cussegl communal da Trun: «I n'è propi betg simpel. I dependa fitg fitg bler da la piazza. Ins sto avair ina lavur per pudair viver. Però jau pens sch'ins è pront d'esser in zic flexibel e da strutturav la vita in zic auter che quai ch'ins ha s'imaginà, sche sch'ins less propi turnar pens jau che quai è sin ina moda u l'otra er pussaivel.»

Che las piazzas da lavur sco er las pussaivladads da sa scolar èn decisivas e gia adina stadas decisivas mussa l'exempel da Clemens Pfister. El è creschì si a Schlans cura che la vischnanca er pli u main anc sin il zenit. E tuttina è er el i a Turitg per far ses emprendissadi sco ser-

rer da maschinas. Entras sa spezialisar sin reparaturas, quai ch'era tschertgà da lez temp en il Grischun, ha el survegnì lavur en differentas firmas ed uschia pudì turnar. Fin ch'el ha survegnì l'onn 1991 l'offerta da manar las lavurs da construcziun e suenter l'entira serenera da Trun. Lura ha el decidì ensem cun sia dunna da turnar cun la famiglia a Schlans, ina decisiun ch'el prendess adina puspè. Clemens Pfister: «Nus avessan qua super, nus avessan tut quai che nus lessan. Però viver, savair viver, avair lavur en la regiun, tut va anoragiu en las aglomeraziuns.»

Er Erica Cavegn-Pfister, la giuvna mamma da 33 onns, ha sentì vid l'atgna via tge influenza che las pussaivladads da sa scolar han sin la dumonda restar u partir. Fin la matura al gimnasi da Mustér ha ella pudì restar a Schlans. Per ses studis da germanistica ed istorgia ha ella però stuì bandunar il Grischun. Suletta-main il studi da scolasta e da scienza d'infurmaziun ha ella pudì far a Cuira. Puncto scolaziun e furnaziun vegnian ins en il Grischun er oz anc spert als cunfins. La HTW a Cuira saja in pass en la drenga direcziun, però na cuvria ella per bler betg tut ils basegns. Tuttina han ella e ses um pudì turnar sco giavischà

suenter il segund uffant en patria. D'ina vart perquai che ses um ha sco chauffeur d'auto da posta pudì midar senza problems lieu da lavur. Da l'otra vart er perquai ch'els han gist chattà in'abitaziun libra en l'anteriura chasa communal e chasa da scola a Schlans.

Erica Cavegn-Pfister è sa decidida sapientivamain cunter la carriera e per la famiglia. Be in post sco commembra dal cussegl da vischnanca ha ella surpiglià. Gnanc en emprima lingia pervi da la mancanza da piazzas, mabain perquai ch'ella è sezza creschida si a Schlans ed ella ha er vuli pussibilitar quai a ses uffants. E ch'i va da far frunt a la depopulaziun mussan er il bab ed ils tschingt fragliuns dad Erica Cavegn-Pfister che vivan tuts, per part sco ella er cun famiglia, stabel a Schlans.

Bleras chasas en possess ester

Chattar in'abitaziun a Schlans n'è betg uschè simpel. Fitg bleras chasas èn numadamain en possess dad ester che vegnan tgi pli savens e tgi pli pauc a far vacanzas en il vitget. Quellas abitaziuns n'èn per il pli betg affitablas sur onn. Clemens Pfister: «Tge fissi sche quels esters na fissan betg en questas chasas.

Lura fissi serrà vi il barcun e na fiss insomma nagina vita. Ed uschia avain tuttina anc in pau esters ch'èn qua e ch'ins po dir ch'els vivan bain cun ils indigens.»

Uniuns ed ustaria motors da la vita en il vitg

La dunna da Clemens Pfister ha avert avant nov onns ina pitschna ustaria. Quai suenter che l'ustaria dal vitg aveva serrà ed ils viandants da la Senda Sursilvana che passan speravi n'avevan nagina pussaivladad pli da far in paus e consumar insatge. Ina purschida che vegn tenor Clemens Pfister er schazegiada dals indigens. Els vegnian savens ed hajan uschia in lieu da s'entupar. Qua tras na stettian ins betg mo persul a chasa e truschia si'atgna chaussa. Er las paucas uniuns ch'existan anc sco il club da jass, il club da skis u la Pro Schlans procurian per vita en il vitg, uschia l'um da 66 onns. Quai conferma er Erica Cavegn-Pfister ch'è tranter auter engaschada en il club da skis e l'uniun da giuventetgna. Er sch'els na sajan mai stads fitg blers en l'uniun da giuventetgna hajan els adina organisà bleras occurrenz, per l'uniun sco per l'entir vitg. E la gliעד haja apprezzià fitg quai, las occurrenz sajan adina stadas visitadas bain.

Giuvnils èn cuntradictorics tar la politica da clima

■ (rtr) Cumbatter per mesiras cunter la midada dal clima gea, far midadas concretas però na: Giuvnils han posiziuns cuntradictorics sch'i va per la politica dal clima. D'ina vart èn 69% da l'opiniun ch'els umans stoppian agir immediat per franar il stgadamment climatic e 65% pretendan mesiras radicalas da la politica. Da l'auter maun refusan circa tuttina blers (66%) mesiras concretas, sco scumonds da motors da diesel u benzina. Sch'i va per l'agen cumportament,alur è er be ina minoritad pronta da desister, per exempel da sgular u da magliar charn. Venderdi vulan sin l'entir mund milliuns giuvnils ir sin via per la protecciun dal clima. Cun 70% sustegna la grond part dals giuvnils la chauma.

reclama



Clemens Pfister sa gida uss sco pensiunà en la pitschna ustaria da curtin che sia dunna ha fundà. In impurtant lieu d'inscuter er per ils indigens che dat vita en il vitg.



Erica Cavegn-Pfister è turnada sco giuvna mamma cun ses dus uffants e ses um a Schlans. I na saja betg simpel, ma pussaivel sch'ins veglia.

FOTOS RTR, G. G. FLEPP

TV

Topaktuell
aus Ihrer
Region!

Südostschweiz
Informiert

Das Nachrichten-
magazin von Montag
bis Freitag ab 18 Uhr
auf TV Südostschweiz.